



ILIDŽA

INFORMATIVNI BILTEN OPĆINE ILIDŽA
Ilidža • Broj 134



Osniva se novo javno preduzeće

Općinsko vijeće Ilidža na 24. redovnoj sjednici, održanoj 29. januara u Multifunkcionalnoj sali donijelo je Odluku o pristupanju osnivanja javnog preduzeća. Ovom Odlukom Općina Ilidža pristupa osnivanju javnog preduzeća za obavljanje poslova od interesa za općinu. Odlukom se ovlašćuje predsjedavajući Općinskog vijeća da u ime Općine Ilidža potpiše ugovor o osnivanju javnog preduzeća i poduzme sve potrebne aktivnosti u postupku za njegovo osnivanje, kao i da nakon notarske obrade ugovora o osnivanju javnog preduzeća isti dostavi Općinskom vijeću na verifikaciju. Zaključkom Općinskog vijeća u 2013. godini kojim je rečeno da Općinsko vijeće Ilidža pokreće inicijativu za izradu "Elaborata o opravdanosti osnivanja javnog komunalnog preduzeća općine Ilidža", kao i Zaključkom Kolegija Vijeća od 17. decembra 2014. godine da se odlaže održavanje druge tematske sjednice Općinskog vijeća posvećene problemu pružanja komunalnih usluga na području općine Ilidža, ova tačka se našla na dnevnom redu i vijeće se pozitivno izjasnilo.

Raspisan javni poziv za dodjelu priznanja Općine Ilidža

Općinsko vijeće donijelo je Odluku o o raspisivanju javnog poziva za dodjelu priznanja Općine Ilidža. Tom odlukom Općinsko vijeće Ilidža raspisuje Javni poziv za predlaganje kandidata za dodjelu priznanja Općine Ilidža i to: Zlatna plaketa Općine Ilidža, Srebrna plaketa Općine Ilidža i Zahvalnica Općine Ilidža. Priznanja Općine Ilidža dodjeljuju se pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine. Izuzetno, priznanja se mogu dodijeliti pojedincima i kolektivima koji nisu sa područja općine Ilidža, ako su njihovi rezultati primjereni ugledu općine. Priznanja se mogu dodjeljivati i posthumno. Prijedloge za dodjelu priznanja mogu podnositi građani pojedinci, udruženja građana, savjeti mjesnih zajednica, boračke organizacije i udruženja, političke partije, vijećnici Općinskog vijeća Ilidža, općinski načelnik, ustanove i drugi organi i organizacije sa područja općine Ilidža. Priznanja se ne mogu dodijeliti uposlenicima općine Ilidža za rezultate ostvarene u obavljanju poslova predviđenih opisom radnog mjesta, vijećnicima Općinskog vijeća Ilidža u vrijeme trajanja mandata i članovima Savjeta mjesnih zajednica u vrijeme trajanja mandata. Priznanja se ne mogu dodijeliti kolektivima ili pojedincima kojim su ista dodijeljena u posljednjih pet godina. Prijedlozi za dodjelu priznanja općine Ilidža u skladu sa navedenim kriterijima iz ovog javnog poziva podnose se do 11. februara 2015. godine.



Objavljuje se oglas za dva člana Općinske izborne komisije

Na 24. sjednici donesena je i Odluka o objavljivanju javnog oglasa za imenovanje dva člana Općinske izborne komisije. Članove Općinske izborne komisije imenuje Općinsko vijeće Ilidža uz saglasnost Centralne izborne komisije Bosne i Hercegovine na period od sedam godina. Kandidati trebaju ispunjavati opće uslove i to da je lice sa pravom glasa, odgovarajućom stručnošću i iskustvom u provedbi izbora. Posebni uslovi su: da je osoba koja ima prebivalište u Općini Ilidža, da ima završen pravni fakultet, odnosno VII/1 stepen stručne spremlje društvenog smjera ili završenu višu školu, odnosno VI/1 stručne spremlje društvenog smjera. Član OIK-a treba biti osoba sa VII/1 stepenom stručne spremlje i drugog smjera ukoliko posjeduje iskustvo u radu izborne komisije u trajanju od najmanje dvije godine od stupanja na snagu Izbornog zakona Bosne i Hercegovine, da posjeduje iskustvo u provođenju izbora (članstvo u izornoj komisiji, članstvo u biračkom odboru, rad u stručnim organima koji su pružali pomoć u provedbi izbora, obavljanje stručnih i naučnih radova iz oblasti izbora). Član općinske izborne komisije može biti predsjednik ili sudija redovnog suda, sekretar općinskog vijeća, odnosno skupštine opštine i gradskog vijeća, lica profesionalno zaposlena u općinskim organima uprave i druga lica, ako ispunjavaju opće uslove. Zadužuje se Komisija za izbor, imenovanja i pitanja ravnopravnosti spolova Općinskog vijeća Ilidža da provede postupak izbora i sačini rang listu sa redoslijedom kandidata prema uspješnosti postignutom na intervjuu, i istu dostavi Općinskom vijeću Ilidža. Općinsko vijeće Ilidža će cijeneći položaj kandidata na rang listi donijeti rješenje o imenovanju dva člana općinske izborne komisije i isto dostaviti na saglasnost Centralnoj izornoj komisiji Bosne i Hercegovine. Mandat člana Općinske izborne komisije teče od dana davanja saglasnosti Centralne izborne komisije BiH.



Edin Muminović novi predsjednik Komisije za planiranje općinskog razvoja

Dino Mulaosmanović, dosadašnji predsjednik Komisije za planiranje općinskog razvoja na lični zahtjev podnio je ostavku na to mjesto. Na prijedlog OO SDA čiji je član bio Mulaosmanović predložen je Edin Muminović. Općinsko vijeće Ilidža imenovalo je Edina Muminovića na mjesto predsjednika Komisije za planiranje općinskog razvoja. Općinska organizacija Stranke za BiH podinijela je inicijativu Općinskom vijeću za izmjenu Nermine Memić, člana radnog tijela Komisije za izbor, imenovanje i pitanje ravnopravnosti spolova. SBiH je predložila Edina Vatrića na njeno mjesto. Općinsko vijeće Ilidža nije prihvatilo ovu inicijativu.

Informacija o poduzetim mjerama na otklanjanju posljedica od poplava

U okviru stalne, redovne tačke Informacije o praćenju stanja od ugroženosti od poplava na svim rizičnim područjima općine Ilidža, Vijeće je upoznato sa informacijom o poduzetim mjerama i aktivnostima na otklanjanju posljedica nastalih poplavom u januaru 2015. godine na području općine. Usljed obilnih kiša i topljenja snijega došlo je do plavljenja pojedinih područja općine Ilidža. Januarskim poplavama zahvaćena su područja mjesnih zajednica Rakovica, Blažuj, Osjek i Stup. Civilna zaštita Općine Ilidža poduzela je neophodne mjere zaštite i spašavanja ljudi i materijalnih dobara na najugroženijim područjima. Pored stalnih obilazaka terena i praćenja situacije angažovano je i 16 povjerenika civilne zaštite u pet mjesnih zajednica, te službe zaštite i spašavanja od požara i rušenja koje su vršile dostavu hrane, vode, higijenskih potrepština, vreća sa pijeskom, a angažovane su i mašine na izgradnji nasipa. Izvršena je dezinfekcija i deratizacija 32 kuće i pomoćna objekta. Zabilježena je i pojava klizišta na lokaciji Kobiljača i Kakrinjski put. U toku su aktivnosti na prikupljanju podataka i procjeni nastale materijalne štete.

Informacija o korištenju prostorija MZ za 2014. godinu

Općinsko vijeće Ilidža primilo je k znanju Informaciju o korištenju prostorija mjesnih zajednica na području općine Ilidža za 2014. godinu. Kako je navedeno u Informaciji prostorije mjesnih zajednica korištene su na način i u skladu sa Odlukom Općinskog vijeća o dodjeli u zakup poslovnih zgrada i poslovnih prostorija na kojima pravo raspolaganja ima općina Ilidža i Odluke o uslovima i načinu korištenja prostorija mjesnih zajednica na području općine Ilidža.

Pozitivno mišljenje za Šumskoprivredno područje „Igmansko“

Općinsko vijeće Ilidža je u okviru tačke dnevnog reda davanje mišljenja na šumsko privrednu osnovu za šumsko privredno područje „Igmansko“ donijelo zaključak kojim daje pozitivno mišljenje uz obavezu potpisivanja sporazuma i retroaktivne isplate naknade od 2009. godine i realizaciju svih predhodnih zaključaka koje je Vijeće donijelo. Pored toga vijeće traži da se u budžetu formira posebna stavka, prihodi od eksploatacije šuma i da se sačini prijedlog plana utroška sredstava dobivenih od naknade za korištenje šuma i dostavi vijeću na usvajanje.

Šumsko privredna područja su formirana radi obezbjeđenja racionalnog i trajnog gospodaranja državnim šumama i šumskim zemljištem što je regulisano Zakonom o šumama Kantona Sarajevo. Ukupna površina ŠGP „Igmansko“ iznosi 26.570,70 hektara, od toga na području općine Ilidža nalazi se 4.756,93 hektara. Šumsko privredna osnova je osnovni dokument na osnovu kojeg se vrši gospodarjenje za period od deset godina što je regulisano Zakonom o šumama Kantona Sarajevo kojim je regulisana i naknada za korištenje šuma koju je korisnik dužan plaćati.



Realizovan 51 projekat obilježavanja značajnih događaja, datuma i ličnosti

Kao informativni materijal na Vijeću je bila i Informacija o provođenju Odluke i Kalendara obilježavanja značajnih događaja, datuma i ličnosti Skupštine Kantona Sarajevo i Općinskog vijeća Ilidža. Na osnovu utvrđene visine sredstava za realizaciju projekata od strane Općinskog vijeća i zaprimljenih aplikacija udruženja po javnom pozivu za 2014. godinu, Komisija za boračka pitanja, rad, zdravstvo i socijalnu politiku Općinskog vijeća predložila je za sufinansiranje 51 projekt obilježavanja značajnih događaja, datuma i ličnosti, pridržavajući se Odluke o jedinstvenim kriterijima finansiranja djelatnosti nevladinih i neprofitnih boračkih udruženja. Za realizaciju 51 odobrenog projekta u 2014. godini Općina Ilidža je iz budžeta izdvojila 100.850 KM.



Uručeni ugovori o stipendiranju 442 učenika i studenata

Općinsko vijeće Ilidža je na 23. redovnoj sjednici donijelo Odluku o stipendiranju 272 talentovana učenika i studenata u školskoj/akademskoj 2014/2015. godini u ukupnom iznosu od 249.480 KM. Odlukom će se stipendirati 173 učenika srednjih škola i 99 studenata. Mjesečni iznos stipendije za učenike i studente prve godine je 78 KM, a za studente od druge do šeste godine kreće se u rasponu od 96 do 120 KM zavisno od postignutog rezultata u predhodnoj godini. Stipendije će se isplaćivati deset mjeseci.

Donesena je Odluku o stipendiranju učenika i studenata slabijeg imovnog stanja u ukupnom iznosu od 108.000 KM, kojom će se stipendirati ukupno 128 učenika i studenata, od toga 80 učenika i 48 studenata. Mjesečni iznos stipendije za učenike je 75 KM, a za studente 100 KM i isplaćivat će se 10 mjeseci.

Vijeće je na sjednici donijelo i Odluku o stipendiranju djece bez oba roditelja i djece bez roditeljskog staranja u iznosu od 44.700 KM za stipendiranje 42 djece, od toga 23 studenata, 9 učenika srednjih i 10 učenika osnovnih škola. Učenicima srednjih i osnovnih škola mjesečni iznos stipendije je 75 KM, a studentima 100KM.

Načelnik Općine Ilidža prof. dr. Senaid Memić, 13. januara 2015. godine u sali Općine Ilidža uručio je ugovore o stipendiranju talentovanih učenika i studenata, djeci slabijeg imovnog stanja i djeci bez oba roditelja i djece bez roditeljskog staranja. Za stipendiranje 442 učenika i studenata u sve tri kategorije Općina Ilidža je iz budžeta izdvojila ukupno 402.180 KM.

„Dodjela ugovora o stipendiranju mi je najdraža obaveza jer ste vi naš ponos i vaše stipendiranje je investiranje u našu budućnost. Vaša jedina obaveza je da nastavite da učite i ove skromne pare utrošite korisno. Želim vam puno sreće u vašem daljnjem školovanju“, kazao je u svom obraćanju učenicima i studentima načelnik Memić.



Predstavljen Elektronski registar administrativnih postupaka u Općini Ilidža

U Općini Ilidža 14. januara 2015. godine zvanično je predstavljen Elektronski registar administrativnih postupaka u Općini Ilidža. Prezentaciji su prisustvovali predstavnici Svjetske banke, Razvojne agencije Kraljevine Švedske, privrednici, vijećnici Općinskog vijeća Ilidža i pomoćnici načelnika. Elektronski registar administrativnih postupaka jedan je od rezultata Globalne prakse za poboljšanje trgovine i konkurentnosti koju provodi IFC i Grupacija Svjetske banke uz pomoć Općine Ilidža i Kraljevine Švedske. Općina Ilidža je u protekloj godini provela detaljnu reformu svih administrativnih postupaka, izvršeno je skraćivanje rokova i koraka pri rješavanju predmeta, a sve sa ciljem povećanja konkurentnosti, smanjenja troškova i rizika poslovanja, te stvaranja uvjeta za privlačenje domaćih i stranih investicija. Uspostavljen je elektronski internet registar koji će omogućiti značajno povećanje transparentnosti i povećati pravnu sigurnost poslovanja na području općine Ilidža. O značaju Elektronskog registra administrativnih postupaka govorio je načelnik Općine Ilidža prof. dr. Senaid Memić o poboljšanju poslovnog okruženja i kvalitetnijem pružanju usluga građanima i pravnim subjektima. Lisa Kaestner regionalna menadžerica Grupacije Svjetske banke za Evropu i Centralnu Aziju ispred Globalne prakse za jačanje konkurentnosti i trgovine u svom obraćanju je čestitala načelniku i njegovom timu koji je uspio da napravi značajne pomake u stvaranju boljih uslova za poslovno okruženje i naporima kako bi projekat uspio. Direktorica Razvojne agencije Kraljevine Švedske, Marie Bergston kazala je da je Švedska vlada od 2011. godine u ove projekte uložila 19,5 miliona SEK i da će se podršku Bosni i Hercegovini nastaviti do 2020. godine sa krajnjim ciljem da pomogne ljudima u ovoj zemlji da bolje žive.

Koordinator projekta Haris Gudić prezentovao je Projekat poboljšanja poslovnog okruženja u Općini Ilidža čiji je osnovni cilj pojednostavljenje administrativnih postupaka i kvalitetnije pružanje usluga, smanjenje rizika i troškova poslovanja, povećanje efikasnosti administracije i povećanje transparentnosti rada organa uprave. Ovim projektom Općina Ilidža je prva na području Kantona Sarajevo eliminisala namjensku saglasnost i prva koja će pribavljati potrebne dokumente po službenoj dužnosti u ime građana i tako skratila proceduru otvaranja firme.



Kiše, podzemne vode i povećani vodostaji, poplave opet

Nakon obilnih kiša u januaru na području općine Ilidža vodostaji rijeka i potoka, su porasli i došlo je ponovo do poplava. Najkritičnije je bilo na području MZ Osjek, Rakovica, Blažuj i Stup.

U ulici Rakovička cesta, iza pilane Hulio, poplavljeno je deset kuća, a poplavljeno je i u ulicama Vlakovo, Stara pruga, Stanjevac. U ulici Plantaže poplavljeno je deset kuća. Tokom ovih poplava bilo je ugroženo oko pedeset kuća. Poplavljeno je bilo i ulicama Karamušići, Osječki put, Bregovi, Hendekuša. Zatvorena je bila i putna komunikacija Pejton-Osjek. Pripadnici CZ evakuisali su Behku Zebo, iza pilane Hulio.

Pripadnici CZ Ilidža nalazili su na terenu i u stanju pripravnosti su bili za sve aktivnosti.

Načelnik Općine Ilidža prof. dr. Senaid Memić je također bio na terenu i obilazio sa ekipom CZ kritična područja te dao nalog da se angažuju svi kapaciteti CZ Ilidža.

„Kao čovjek se suosjećam sa stanovnicima koje je zadefinirano ovo stanje, i mi poduzimamo sve što je u našoj nadležnosti i u okviru materijalnih i ljudskih resursa da pomognemo ovim ljudima. Problem je dugoročan i iziskuje ogromna sredstva koje mi planiramo u budžetu svake godine, ali su sredstva nedovoljna. Ovakvo stanje koje izazivaju poplave nije problem samo Općine Ilidža, već cijelog Kantona. Za rješavanje ovog problema potreban je angažman mnogih institucija (Agencija slivovi rijeke Save) kao i svih općina u KS i samog Kantona i Federacije BiH.

Općina Ilidža je u protekle četiri godine za rješavanje problema regulacija čišćenja i uređenja korita izdvojila iz budžeta 3.200.000 KM. Samo za rješavanje imovinsko-pravnih pitanja utrošeno je 1.041.023,62 KM za radove regulacije i održavanje korita 2.155.240,35 kao i sredstva za civilnu zaštitu 368.487,61 KM. Također, mi kao lokalna zajednica i u drugim vidovima pomoći izlazimo u susret građanima ugroženim poplavom“ rekao je načelnik Općine Ilidža prof. dr. Senaid Memić.

Podijeljena hrana najugroženijim

Članovi Službe za zaštitu i spašavanje Crvenog križa Općine Ilidža pri Civilnoj zaštiti općine Ilidža 22 januara 2015. godine su obišli tri mjesne zajednice: Osjek - Bratunačka cesta, Osječki put, Hendekuša, Karamušići i Osik; Blažuj - Stara pruga, Vlakovo i Rakovička cesta; Stup - Bregovi, koje su pogođene posljednjim poplavama i uručili pakete higijene građanima.

Paketi su dijelom donacija Crvenog križa Federacije BiH a dijelom su iz zalih Crvenog križa Ilidža namijenjenih za elementarne nepogode.

Higijenski paketi su podijeljeni porodicama kojima je voda ušla u stambene i pomoćne objekte.



Štab CZ : Hitno provesti dezinfekcija na području Ilidže

Na području općine Ilidža rijeke su se povukle u svoja korita, trenutno nema poplavljenih kuća, niti prekid komunikacija i stanje se normalizovalo, rečeno je to 22. januara na drugoj vanrednoj sjednici Štaba Civilne zaštite Općine Ilidža u općini. Poplavljeno je 140 objekata i veća površina poljoprivrednog zemljišta. Voda iz lokalnih vodovoda nije za upotrebu i upozorava se građanstvo da ne koriste vodu iz lokalnog vodovoda odnosno i dalje se preporučuje građanima prokuhavanje vode za piće, pripremanje hrane, pranje posuđa i ličnu higijenu, ili da koriste flaširanu vodu. Iz ugroženih područja evakuisano je pet osoba. Voda iz gradskog vodovoda odgovara pravilniku o uslovima ispravnosti vode.

Angažovane su službe zaštite i spašavanja od rušenja sa mehanizacijom zbog pročepljavanja propusta. Odveženo je pet kamiona pjeska na poplavljena područja.

Trenutno se na području Osjeka provodi dezinfekcija od strane Zavoda za javno zdravstvo KS. Angažovano je 16 povjerenika za praćenje situacije i redovnog izvještavanja te popisa kuća u koje je voda ušla radi vršenja dezinfekcije.



Djeljena i voda

Nakon poziva Civilne zaštite Općine Ilidža volonteri Crvenog križa Općine Ilidža te članovi Službe zaštite i spašavanja Civilne zaštite (Služba za prvu pomoć, snadbijevanje i logistiku) izašli su na teren u naselje Bregovi i MZ Rakovica te zajedno sa povjerenicima Civilne zaštite općine Ilidža izvršili distribuciju pitke vode u količini od 347 litara, jer je bila prioritet građana na tom području.



Služba za prostorno uređenje Općine Ilidža riješila 1869 upravnih postupaka

Općina Ilidža je putem Službe za prostorno uređenje u 2014. godini riješila 1869 upravnih postupaka. Od toga, u postupku legalizacije bespravno izgrađenih objekata, riješeno je 963 zahtjeva i to naknadna urbanistička saglasnost 584, naknadno odobrenje za građenje 250, te 73 upotrebne dozvole i 53 izmjene produženja.

U 2014. godini Služba je na prijedlog načelnika pripremila, a Općinsko vijeće donijelo značajan broj planskih dokumenata i to u različitim fazama.

Usvojeni su Regulacioni plan Hrasnica i Centar, nacrt RP Blažuj, RP Doglodi te donesene odluke o pristupanju i izradi RP Alipašin most, Nova Ilidža 1, 2, 3, te Urbanistički projekat Riverina-Sastavci faza A-1.

Služba za prostorno uređenje je tokom 2014. godine za određene faze planskih dokumenata održala javne rasprave po MZ, tribine a po programu i planu rada i dostavljenog materijala od strane Zavoda za planiranje i razvoj Kantona Sarajevo. U toku 2014. godine izdato je i riješeno 538 zahtjeva za saglasnost za priključak električne energije, a po zahtjevima vlasnika objekata. U sklopu svoje nadležnosti Služba je rješavala i izdavala izvode iz planskih dokumenata, uvjerenja, saglasnosti i slično.



Iz matičnih knjiga izdato 26.699 izvoda

U 2014. godini, tačnije 30 juna u Općini Ilidža pušten je u funkciju jedinstveni matični registar na osnovu kojeg se izvodi iz matičnih knjiga mogu izdavati i za druge općine na području Federacije BiH, što je značajno povećalo broj izdatih izvoda iz matičnih knjiga. Općina Ilidža je u 2014. izdala ukupno 26.699 izvoda i uvjerenja iz matičnih knjiga.

Također, donesen je i Zakon o izmjenama i dopunama Zakona o matičnim knjigama, kojim je propisano da se upis rođenja djeteta u matičnu knjigu rođenih vrši po osnovu prebivališta majke, a upis u knjigu umrlih po posljednjem prebivalištu, zbog čega je došlo do povećanja broja upisa u navedene knjige. Tako da je za tri mjeseca od stupanja na snagu ovog zakona u matičnu knjigu rođenih upisano 346 osoba, a u matičnu knjigu umrlih 512 osoba. Do značajnog povećanja obima posla došlo je i izdavanjem biometrijskih pasoša, pri čemu je Matični ured Općine Ilidža izvršio provjeru podataka u matičnim knjigama za 4.806 osoba, a za biometrijsku ličnu kartu 17.209, što je povećanje za 50 posto u odnosu na 2013. godinu.

Kad je u pitanju ovjera potpisa, rukopisa i prepisa ovjerenje je ukupno 274.876 i to 233.245 ovjera kopija i 41.631 ovjera potpisa.

U oblasti upravnog rješavanja riješeno je 1789 predmeta koji se odnose na ispravku, dopune podataka u matičnim knjigama, naknadni upis u knjige rođenih i knjige umrlih.

Sklopljeno 511 brakova

Kako smo saznali u Službi za opću upravu Općine Ilidža u 2014. godini povećan je broj sklopljenih brakova u odnosu na 2013. godinu. Svoje sudbonosno „Da“ pred matičarem Općine Ilidža izreklo je i u novi zajednički život krenulo, 511 parova.

Sklapanje braka u Općini Ilidža je jednostavno, ukoliko se dostavi sva potrebna dokumentacija.





Zamjenjena stolarija u Drugoj osnovnoj školi Hrasnica

U Drugoj osnovnoj školi u Hrasnici završeni su radovi na zamjeni stare dotrajale stolarije novom pvc stolarijom sa termoizolacionim staklima.

Riječ je o projektu utopljanja školskih objekata, koji su zajednički finansirali Općina Ilidža i Federalno ministarstvo prostornog uređenja. Vrijednost radova iznosi 79.970 konvertibilnih maraka. Od toga Općina Ilidža je sufinansirala 29.970 KM.

„Ovdje je kompletan nastavni proces olakšan. Prozori su bili dotrajali, stari, nisu se mogli ni zatvarati. Učenici su nam sjedili u jaknama, a sada rade i uče u toplim učionicama. Ja kao osoba na čelu ove škole, menadžment, učenici i roditelji želimo da zahvalimo načelniku Općine prof. dr. Senaidu Memiću koji je imao razumijevanja i podržao ovaj projekat“ rekla je direktorica Arnela Trešnjo. Ona je dodala da je ovim projektom poboljšana ušteda toplotne energije, školske prostorije je lakše zagrijati, a i škola je poprimila i ljepši izgled. Trešnjo je izrazila nadu da će Općina u narednom periodu imati razumijevanja i za drugu fazu, odnosno zamjenu stolarije u drugom dijelu objekta.

„Kad smo pošli u drugo polugodište primjeti smo da je naša škola drugačija, ljepša. Kad smo ušli bilo je veoma toplo i mogli smo nastavu pratiti u džemperima. Ne čuju se ni glasovi iz dvorišta. Mnogo nam je ljepše i ugodnije. Hvala našoj direktorici i načelniku Senaidu Memiću“ kazala je Dženita Panjeta učenica devetog razreda ove škole.

Iz Budžeta Općine Ilidža za pomoć socijalno ugroženim licima isplaćeno 162.550 KM

Općina Ilidža je putem Službe za rad, socijalna pitanja, zdravstvo, izbjeglice i raseljena lica, na osnovu kriterija za dodjelu novčane pomoći socijalno najugroženijim licima na području ove općine, razmotrila 1.365 zahtjeva. Na osnovu prikupljene dokumentacije i lječničkih nalaza, Komisija je ocijenila da je 1.175 zahtjeva opravdano i dodjela im novčanu pomoć u iznosu od 50,00 KM do 800,00 KM. Iz Budžeta je za te namjene isplaćeno 162.550,00 KM.

Odbijeno je 190 zahtjeva jer podnosioci nisu ispunjavali kriterije za dodjelu novčane pomoći socijalno ugroženim licima.



Sredstvima Općine Ilidža u iznosu od 15.000 KM sve učionice ove škole u 2014. godini su okrečene.

„Zidovi su nam sad čisti i bjeli, a sad naši učenici pohađaju nastavu u mnogo zdravijim prostorijama“ rekla je Trešnjo. U 2015. godini planiraju i otvaranje produženog boravka. U toku su završni radovi ovih prostorija koji će biti smješteni u 90 kvadratnih metara. Modernizacija školskog prostora, stvaranje uvjeta za kvalitetnije i ugodnije odvijanje nastave želja je učenika i nastavnika svih škola, a i Općine Ilidža, bez obzira što nema ingerencije, i ubudućem periodu će nastojati donekle ostvariti ovu želju.

Austrougarske vlasti su 1907. počele izgradnju škole u Hrasnici. Zemljište za izgradnju poklonili su članovi porodice Mehremić. Izgradnja je trajala godinu dana, a škola je dobila naziv Narodna osnovna škola. Prva školska godina počela je je 1908. U prvi razred upisana su 22 učenika. Između dva svjetska rata 1918-1941. školu je pohađalo 1490 učenika.

Izgradnja fabrike motora je rezultirala i nagli priliv stanovništva i porast broja učenika. Novoizgrađena škola je počela sa radom 29. novembra 1957. godine. Na prijedlog Skupštine opštine Ilidža, škola je dobila naziv „Aleksa Šantić“, a kao Dan škole određen je 27. maj. U školskoj 1967/1968. školu je pohađalo 1925 učenika, a nastava se izvodila u tri smjene. Od 1992. godine do 1995. škola se neprekidno granatirala a nastava je prekinuta. Škola je svoje prostorije ustupila službama MZ Hrasnica II, kriznom štabu i drugim službama neophodnim za funkcionisanje civilnih organa vlasti. U toku agresije nastava se odvijala po punktovima. Tokom 1997. godine izvršena je preregistracija škole pod nazivom Druga osnovna škola, jer su se odlukom Prelaznog općinskog vijeća od 5. jula 1996. promijenili nazivi svih osnovnih škola na području općine Ilidža. Novi nazivi su dati prema redoslijedu izgradnji škola.



Obilježene 73 godine legendarnog Igmanskog marša

Tradicionalni Igmanski marš, koji se održava u povodu sjećanja na 27. januar 1942. godine, jedne od najznačajnijih operacija tokom NOB-a u Drugom svjetskom ratu, kada su borci Prve proleterske brigade pod nemogućim uslovima preko Igmana došli u oslobođenju Foču, održan je 24. januara 2015. godine.

Udruženje antifašista i boraca NOR-a Ilidža u znak sjećanje na Igmanski marš položile su cvijeće na spomenike Vrelo Bosne i Osjeku.

U prisustvu više stotina učesnika okupljeni na Gubavcu, kolona se uputila u pravcu Brezovače na Igmanu. Podsjetili su se kao su u borbi za slobodu, partizani i članovi Prve proleterske brigade su na taj dan krenuli u svoj legendarni pohod. I pored toga što su mnogi nakon toga ostali invalidi, mogli su da budu ponosni što su se izborili sa - 40 stepeni. Oko 700 vojnika, koliko ih je učestvovalo u maršu tokom druge neprijateljske ofaznive, prepješćali su neverovatnih 100 kilometara preko Sarajevskog polja i planine Igman, do Foče, a pohod je trajao je 18 sati. Zbog promrzlina, ostali su bez prstiju na nogama, prema svjedocima tog događaja, nekim su bile amputirane noge, ali su svi bili presrećni što su uspjeli u svom cilju. Uspjeli su da hodaju više od 18 sati



bez prestanka, pružili su veliki napor i otpor surovoj hladnoći i na kraju došli na bezbjedno mjesto.

Udruženje antifašista i boraca NOR-a Ilidža i Hadžića su 23. januara, kao pravi domaćini primili goste, predstavnike SUBNOR-a iz Užica i Bajine Bašte, sa njima su obišli Bašćaršiju i svakako počastili ih čuvenim čevapčićima.

Predsjednik UABNOR-a Ilidža Nikola Babić uručio je Zahvalnice pripadnicima SUBNOR-a iz Užica i Bajine Bašte i kako nam reče, nastavit će i dalje dobru saradnju.

Javna rasprava o RP "Blažuj"

U prostorijama MZ Blažuj, ulica Vlakovo 102 b, 9. februara u 17.00 održat će javna rasprava o RP "Blažuj" a 10. februara u 17.00 u prostorijama MZ Osjek (ulica Osik broj 114 a). Primjedbe, prijedlozi, sugestije i mišljenja svih zainteresiranih subjekata planiranja, mjesnih zajednica, potencijalnih investitora, građana, vijećnika Općinskog vijeća Ilidža mogu se dostaviti Službi za prostorno uređenje Općine Ilidža, 15 dana nakon održavanja javne rasprave.

Zimsko održavanje cesta vrše tri izvođača

Zimsko održavanje saobraćajnica na području općine Ilidža povjereno je firmama MGBH d.o.o Sarajevo, Sarajevoputevi d.d i Bucomerc d.o.o Kiseljak.

Izvođač MGBH d.o.o. Sarajevo vrši čišćenje saobraćajnica u sljedećim mjesnim zajednicama: MZ Rakovica, MZ Blažuj i MZ Osjek.

Izvođač Sarajevoputevi d.d. Sarajevo čistit će saobraćajnice u mjesnim zajednicama: MZ Ilidža Centar, MZ Otes, MZ Stup, MZ Stup II, MZ Stupsko brdo, MZ Butmir i MZ Donji Kotorac.

Buco merc d.d. Kiseljak održavat će ceste u mjesnim zajednicama: MZ Vrelo Bosne, MZ Vreoca, MZ Lužani, MZ Sokolović- Kolonija, MZ Hrasnica I i MZ Hrasnica II.

Ukupna dužina saobraćajnica prvog prioriteta je 108,59 km, pješačkih staza 31,45, i platoa 6.150,00 kvadratna metra.

Održana Skupština Udruženja poljoprivrednika

Udruženje poljoprivrednika Kantona Sarajevo je u saradnji sa UPI Zemljoradničkom zadrugom Ilidža i Općinom Ilidža održalo Skupštinu u prostorijama Zemljoradnička zadruge u Blažuju. Skupštini su prisustvovali članovi Skupštine kao i načelnik Općine Ilidža prof. dr. Senaid Memić, gdje je analizirano negativno poslovanje, a i okolnosti koje su izazvali radovi koridora 5 C.

„Udruženje poljoprivrednika KS koristi priliku da zahvali direktoru ZZ Almiru Džankoviću i načelniku Općine Ilidža prof. dr. Senaidu Memiću koji su u proteklom godinu dali nesebičan doprinos akcijama poljoprivrednih proizvođača, a koji su zapostavljeni od svih nivoa od Kantona do Federacije BiH. Načelnik Memić kao i iz ZZ su nam obećali pomoć u okviru svojih mogućnosti kako bi udruženje moglo i dalje funkcionisati,“ rekao je predsjednik Udruženja poljoprivrednika KS Kadrija Tahmiz.

Škola pčerstva

Uorganizaciji Udruženja pčelara „Behar“ Općine Ilidža 29. januara 2015. godine počela je škola pčelarstva. Škola će se održavati u Maloj aleji 40 i to ponedjeljkom i četvrtkom u 18. sati. Predviđeno je 35 časova. Predavač će biti Muamer Lisica.

Za sve informacije možete se informisati putem telefona 061 028 037.



Djeca Škole prijateljstva obavila sistematski pregled zuba

Obrazovno rasonodni centar za mlade SPAJALICA u saradnji sa Stomatološkom službom Doma zdravlja Ilidža je organizirao kolektivni sistematski pregled oralnog zdravlja za djecu mlade životne dobi. Petnaestoro djece, polaznica i polaznika škole prijateljstva, nakon edukativne radionice koja je održana u SPAJALICI o temi oralnog zdravlja je u društvu projektnih koordinatora SPAJALICE obavilo detaljan sistematski pregled zuba.

Osnovna svrha sistematskih pregleda jeste praćenje pravilnog rasta i razvoja zuba, utvrđivanja tjelesnog i društvenog zdravlja s ciljem rane prevencije i otkrivanja karijesa ali i dentalnih anomalija kod djece. Zdravi zubi su preduslov zdravog djeteta a malene kvarove na mliječnim zubićima je lako popraviti. Posebno treba djeci naglašavati koliko je higijena zuba i usta bitna te da loše navike u ishrani utiču na zdravlje zuba.

„U stomatološkoj ordinaciji na Ilidži redovno popravljamo zubiće djece našeg lokalnog područja, tokom sistematskih pregleda smo primijetili veliki broj kvarova na



zubima kod djece koji su posljedica loše higijene zuba ali i pogrešne prehrane u ranoj dobi. Ovom problemu bi se trebalo pristupiti sistematski pa je tako nužno potrebno sistematski provesti fluoridaciju zuba kod djece, što bi dodatno zaštitilo dječje zubiće. Danas smo tokom sistemskog pregleda ustanovili broj pokvarenih i popravljenih zuba kod djece, napravili evidenciju i putem projektnih koordinatorica SPAJALICE poslali poruku roditeljima koji bi trebali postupiti po našim uputama. Djeca su kao i uvijek bila dobra, njima je ovo još jedna prilika za druženje a kao nagradu su dobili raspored časova i diplome za hrabrost koje mi dodjeljujemo najmlađim heroinama i herojima prilikom posjete stomatologu“, istakla je dr. Sabiha Kapetanović.

Uposlenici Općine Ilidža darivali krv

Uposlenici Općine Ilidža odazvali su se redovnoj godišnjoj akciji darivanja krvi koja je, u saradnji sa Zavodom za transfuzijsku medicinu Federacije Bosne i Hercegovine, organizovana 2. februara 2015. godine u prostorijama Općine Ilidža.

Kao i predhodnih godina, akciji se odazvao veliki broj uposlenika Općine Ilidža, koji su ovim činom još jednom pokazali svoju humanost i spremnost za pomoć onima kojima je ona potrebna.

Prilikom darivanja krvi dobrovoljnim darivaocima se odredi krvna grupa, RH faktor, nivo hemoglobina u krvi i obavi kratki ljekarski pregled, a krv se testira i na krvlju prenosive bolesti kao što su hepatitis B i C, sida i sifilis.

Doktor Bljerim Adžanel se u ime Zavoda zahvalio Općini Ilidža i njenim uposlenicima na podršci i učešću u akciji darivanja krvi i tom prilikom istakao



da je svaka kap krvi dragocjena i može spasiti nečiji život i da je važno obavijestiti građane da je davanje krvi zdravo i poželjno jer se na taj način reguliše krvni pritisak, hemoglobin, regenerišu se krvne stanice, organizam se oslobađa od toksina koji su vezani za krvne elemente, snižava se nivo holesterola i triglicerida.



I ove godine večer poezije „Ilidžo u srcu i stihu te nosim“

Udruženje za djecu i mlade „NOMINATIV“ Ilidža, započelo je projekat Četvrto veče poezije pod nazivom „Ilidžo u srcu i stihu te nosim“ koji je namijenjen svim učenicima od drugog do devetog razreda osnovnih škola naše općine.

„Projekat se realizuje već četvrtu godinu zaredom, i može se reći da je interesovanje učenika veoma velika. Ove godine, radovi će biti pisani na teme „Ilidža to je naš dragulj“ i „Ilidžo pjesmu ti pišem“. Literarni radovi, koji budu odabrani od strane organizacionog tima i žirija, bit će predstavljani u izvođenju autora, 29. marta kada će biti upriličena svečana završnica Četvrte večeri poezije „Ilidžo, u srcu i stihu te nosim“ u Multimedijalnom centru Općine Ilidža“ rekao nam je vođa projekta Džemo Hurić.

Za sve učesnike koji budu ušli u završni krug takmičenja, obezbjeđene su zahvalnice, a za osvojeno prvo, drugo i treće mjesto nagrade. Na ovoj svečanosti, bit će dodijeljena i specijalna nagrada „Aida Lušničkić“.

Ilidža je oduvijek bila inspiracija za velike pjesnike, pisce, putopisce, ali i one sasvim „obične“ prolaznike. Ilidžom je protkana nit, koja povezuje najljepše stihove, a ti stihovi ne mogu, a da ne dopru u svako srce i dušu onih, koji su ih čuli. „U nastojanju da nastavimo u tom najljepšem poetskom ritmu, odlučili smo da u povodu „Dana Općine Ilidža 2015.“ organizujemo Četvrto veče poezije, pod simboličnim nazivom „Ilidžo u srcu i stihu te nosim“. Dodatni motiv bio je i taj, da kod ilidžanskih osnovaca podstaknemo njihov literarni izražaj i damo im priliku, da svoju spisateljsku sposobnost i maštu prenesu na papir, a potom, da svoje radove predstavite široj javnosti,“ dodao je Džemo Hurić, vođa projekta.

Još jedan uspješan projekat je u procesu implementacije, a koji su nam predstavili članovi Udruženja za djecu i mlade „NOMINATIV“ je Muzički festival „Djeca pjevaju hitove“ i „Moj hit je dar, Ilidži za rođendan“. Pod pokroviteljstvom Općine Ilidža i ove godine festival će se realizovati kroz nekoliko ciklusa (prva audicija, polufinale, finale). Projekat je započet još u decembru 2014. godine, a već u januaru 2015. godine takmičari se spremaju za polufinale. U martu 2015. godine, u povodu Dana Općine Ilidža 2015., bit će održana završnica festivala-finale, kada će biti proglašeni najbolji i najuspješniji. Projekat je namijenjen osnovcima sa naše općine. Organizator je i ove godine obezbijedio vrijedne nagrade, i to prvo mjesto snimanje originalnog i vlastitog studijskog singla i učešće u drugim projektima, drugo mjesto snimanje dvije numere uz postojeće matrice koju takmičar odabere, te treće mjesto snimanje jedne numere uz postojeću matricu koju takmičar odabere.

“Ritam” nikog ne ostavlja ravnodušnim

KUD “Ekrem Mujkić” je jedan od aktivnih Udruženja na prostorima općine Ilidža. Baštini tradicionalno blago Bosne i Hercegovine. KUD “Ekrem Mujkić” na raznim turnejama predstavlja našu Općinu u najboljem svjetlu. Trenutno ima 267 aktivnih članova, koji svojim članstvom pokazuju talenat u više sekcija. Udruženje ima: folklornu, dramsku, veteransku, plesnu sekciju i orkestar.

KUD 2014. osniva veteransku i plesnu sekciju. Veteranska sekcija sastoji se od 20-tak članova a vodi je stručni rukovodioc Vedad Polovina.

Plesna sekcija KUD-a ima 35 aktivnih članova. Rukovodioc plesne sekcije je dugogodišnja i članica KUD-a Lejla Efendić. Za kratak period osmišljene su dvije koreografije prva pod nazivom “Ritam” (moderni i orijentalni ples) a druga koreografija pod nazivom “Memento mori” Nastupali su: kao i sve ostale sekcije KUD-a za Dane Općine, te za Festival “Susreti prijatelja” Pokazujući svoju radost u plesu afirmiraju mnoge omladince na druženje i putovanje svijetom uz očuvanje tradicije i pokazivanje radosti kroz ples.



Obavještenje iz Spjalice

Iz Škole prijateljstva u Spjalici obavještavaju roditelje i polaznike dječijih radionica i kurseva, da će od februara 2015. godine doći do malih izmjena u terminima održavanja aktivnosti namijenjenih djeci. Škola prijateljstva će se održavati utorkom i četvrtkom u terminima od 10 do 12.30 sati i od 14 do 16.30 sati. Kurs engleskog jezika za djecu održavat će se subotom prema sljedećem rasporedu: prvi, drugi i treći razredi (11:00 - 12:00), četvrti, peti i šesti razredi (12:00 - 13:00h), sedmi, osmi i deveti razredi (13:00 - 14:00h).

Kurs njemačkog jezika za djecu održavat će se nedjeljom prema sljedećem rasporedu: od prvog do šestog razreda (11:00 - 12:00), a od sedmog do devetog (12:00 - 13:00h)

Ukoliko imate pitanja, budite slobodni pozvati ih putem telefona 033 637-290.



Marko Šljivić prvak BiH u slalomu

Slalom utrkom na Bjelašnici završeno je deveto međunarodno takmičenje u alpskom skijanju BH Telekom Ilidža Fis Cup 2015. godine koje je istovremeno i državno prvenstvo BiH u slalomu. Prvo mjesto osvojio je bugarski reprezentativac Nikola Chongorov. Od naših učesnika najbolji rezultat ostvario je Marko Šljivić. Podijelio je šesto mjesto sa Slovencem Casom Jurom a istovremeno je postao i državni prvak u slalomu. U ženskoj konkurenciji državna prvakinja u slalomu je Šejla Merdanović.

Organizaotro utrke bio je Ski klub „Ilidža“ koji je zbog loših vremenskih uvjeta uložio ogroman napor da organizuje ovu trku.

„Naša djeca iz BiH postigla su dobre rezultate. Neki se nisu odazvali na trku mada su trebali biti tu. Nadamo se da će iduće godine biti svi

na broju, a i nekih novih učesnika očekujemo „ rekao je Amer Holjan, jedan od organizatora trke.

BH Telecom Ilidža Fis Cup po ocjeni zvaničnika iz Ski saveza BiH, učesnika i odgovornih lica iz Međunarodne skijaške federacije, najbolje organizovano takmičenje u BiH.



Anes Čongo proglašen za „Najuspješnijeg juniora“

Anes Čongo, član KK „Champion“ proglašen je 23. januara 2015. godine u Narodnom pozorištu u Sarajevu na 70. Izboru najuspješnijih sportista i sportskih ekipa Bosne i Hercegovine u 2014. godinu za najuspješnijeg juniora. Anes Čongo je osvojio prvo mjesto na Evropskom prvenstvu (juniori), prvo mjesto na Balkanskom prvenstvu U21, treće mjesto na Balkanskom prvenstvu (seniori).

Stručni žiri je dodijelio priznanja u osam kategorija, a pored toga su dodijeljena specijalna priznanja i specijalne nagrade.



Uz pomoć općine održana Škola skijanja

Odgovarajući zimski uvjeti i dovoljna količina snijega na Bjelašnici i Igmanu obradovali su sve veći broj ilidžanskih osnovaca koji se žele okušati u zimskim sportovima. Kako bi se to učinilo na najbolji način Općina Ilidža je sa Udruženjem RVI i ove godine organizovala Školu skijanja. Škola skijanja se održavala od 12. do 19. januara na Malom polju.

Obuku su vršili profesionalni instruktori uz jednog pedagoga i dva pomagača, a djeci je obezbijeđen prijevoz, topli čaj i grickalice. Cjena za početnike iznosila je 60 KM, a za napredne 100 KM.



Semizova kula

Ishod na porodična imanja u naseljima na području Ilidže predstavljao je značajan događaj i promjenu u svakodnevnom životu višeg plemstva i drugih uglednih žitelja Osmanskog carstva. Više plemstvo je imalo privilegiju da stanuje u gradu. Ishodilo se samostalno ili s cijelom obitelji. Čest je slučaj bio da je ishodnike pratio dio posluge ili drugo pomoćno osoblje. Karakter ishoda i njegova svrha su bili različiti. Najčešće se ishodilo na Ilidžu zbog privremenog boravka i sezonskih ljetnih poslova na imanjima. Ishodnici su boravili u begovskoj kući, odžaku, konaku ili ishodnoj kući. Ishodilo se i na kraće vrijeme u obilazak imanja u pohode široj obitelji i prijateljima te na teferić u svježinu Vrela Bosne u trenucima dokolice. Ishodilo se i do termalnih izvora u cilju otklanjanja zdravstvenih tegoba ali u skladu s običajima i moralnim načelima vremena.

Imućniji građani su na svojim imanjima gradili tzv. ishodne kuće u kojima su provodili ljetni odmor. U prostorno-volumenskim odnosima ishodne kuće i odžaci prostirali su se više u širinu tj. vodoravno i najčešće su imale jedan, a u rijetkim slučajevima i dva kata.

Ishodne kuće i odžaci imale su pravokutnu osnovu i građeni su od kamena, ćerpiča i drveta. Danas u Kovačima postoji velika ishodna kuća vlasništva porodica Semiz iz Sarajeva.

